

19. april 2019

UPA2018/126

Kalaallit Nunatsinni ullumik pinngortitamut qujaniarfimmik Naalackersuisut pilersitsinissamik peqquneqarnissaannik Inatsisartunut aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Mimi Karlsen IA-meersoq peqqusivoq ullormik qujamasuffimmik atulersitseqqusilluni. Siunnersuuteqartup tunngavilersuutigaa kalaallit uagut nerisatsinnut, imartatsinnut, uusunik nerisatsinnut allatigullu annertuumik qujaniartuusugut, tamannalu ilumoorpoq.

Inuiaavugut kalaallit naggueqatigiit Inuit nerisassaatsinnik annertuumik qujamasuuteqartut. Qasseriarlutami kalaaliminertuusaarluta oqartarpugut, kalaaliulluni nuan!

Inuiattut ataatsimoorumatuujuvugut, kalaaliminertornialeraangatta arlaliulluta neriumasarluta. Tassa nerisavut aallaavigalugit ataatsimuussutsimik misigineq qanitavullu nereqatigiumasaratsit kalaaliminertoqateqarluni mamarnerusutut ittarmat. Ataatsimuussuseq angisooq tassuuna pingaarput aamma pingaartitaraarput. Tassa taamaattuassaaq nuannersorsuummat nereqatigiinneq kalaaliminiutivut pingaartumik pineqartillugit.

Siunnersuuteqartup tunngavilersuutigaa inuiattut ataatsimoorfiit pingaaruteqartut tamannalu assortunngilarput, ilanngullugulu siunnersuutigaa pinngortitamut qujamasuffimmik pilersitsisoqartariaqartoq naalackersuisutigoortumik.

Naalackersuisutigoortuunngikkaluartumik atuutilersitsinngikkaluartumik pinngortitamut qujaniartuuvugut. Nerisassaqartimmatigut, mamartorsuarnik nutaartugassaqartittarmatigut, inuiattut kinaassutsitsinnik ersiuteqartimmatigut aammalu inuiattut nukittuunngortittarmatigut.

Tamanna piuvoq ukioq kaajallallugu, ullut tamaasa. Inuiattut qujamasuutigiuarparput pinngortitamit pissaqartinneqartarnerput. Piniartortaqaanngikkaluarlutaluunniit pissaqartarpugut avitseqatigiinneq, pisiassaqarneq pajuttarnerillu pillugit. Nalliuttut tamaasa, kaffillernerni ullorsiornerillu tamaasa pinngortitap tunniussinnaasai qujamasuutigalugit ataatsimoorfigisarparput. Ullut tamaasa, ukioq kaajallallugu.

Pinngortitarsuarmi anersaakkut pissarsisarneq, alianaarsaartarneq aammalu nikissamik aallerfittut atorlugu nersorinnissutigisarparput ullut tamaasa.

Siunnersuuteqartup nalliussisarnissaq ullormik ataatsimik siunnersuutigaa. Tamannalu uagut isumaqataaffiginngilarput. Kalaaliminiutivut, pinngortitarsuaq avatangiiserpullu

pingaartuaannartussaavoq anersaakkut ataatsimuussutsikkullu ukioq kaajallallugu. Nersorinnineq ukioq kaajallallugu piuvoq, pioreerpoq.

Meeqqat oktoberimi atuangiffeqartarput taassumalu siunertavia tassaavoq qilalukkat takkussimaarfiini ilapertuutaasinnaaniassammata atuangiffik, piffinni allani naatsiat inerittut katersorniarnerni ikiuuttussaammata, allanilu ukiarnerani ineritat katersorlugit nalliuttorsiorneq piniassammat atuangiffeqartarput. Tassa pinngortitap tunniussinnaasai pingaartillugit peqataatitsiffiusumik siunertaqartumik aaqqissuussineq. Tamanna immaqa ullutsinni sulingiffeqartinneqartarneq atuangiffeqartinneqartarnerullu isumaa immaqa eqqarsaatigivallaarunnaamisimavarput pissusissamisuunginnartutullu isigilersimallutigu.

Naalackersuisut akissuteqarnermini erseqqissaassutigaat ullut pingaartitavut inuiattullu ileqqoqarfigilersimavagut amerlasuut naalackersuisutigoortumik aaqqissugaanngikkaluarlutik inuiattut ataatsimoorfigivut, soorlu meeqqat ulluat, aalisartut ulluat, kattuffiit peqatigiiffiillu namminerisamik piumassutsimikkut ataatsimoortitsiffiusut ullumikkut pingaartitaraavut.

Pingaartitavut pigisavut aamma pinngortitamut tunngasutigut ataatsimoorfigisarput inuppalaartumik namminerisamik pigisatut aaqqissuussisoqarnissaanik utaqqisuunngitsumik pigiuartigu.

Taamaammat siunnersuut taamatut isikkoqartillugu itigartitsissutigaarput, ataatsimulli ullut tamaasa pinngortitarsuatsinnut nersorinnineq pigiumallugu ingerlaqqissuugut.

Doris Jensen Jakobsen